



Акафист святой блаженной Любови Рязанской

Кондак 1

Избранная от юных лет любовью Христовою,
Егоже ради в подвиге юродства просиявшая,
молитвеннице и заступнице дивная земли
Рязанския, святая блаженная мати наша
Любовь, хвалебное пение приносим ти, чтущии
святую память твою, ты же ныне предстоящи со
дерзновением Царю и Владыце всяческих, не
престай взывати к Милостивому Спасу о нас,
зовущих ти:

Радуйся, святая блаженная мати Любовь,
угоднице Христова и молитвеннице о душах
наших.

Икос 1

Ангелом подражавшая в земном житии своем,
еще от купели Любовью наречена бе, и сию
добродетель измлада стяжавши, безумием
мнимым безумие мира презрела еси, темже
призри на молитвы с любовью глаголющих тебе
сице:

Радуйся, от святыя купели Любовью
нареченная.

Радуйся, сею добродетелию щедро обогащенная.
Радуйся, от страждущия твоея плоти скорбь терпевшая.

Радуйся, пред образом святителя Николая молитвы возносившая.

Радуйся, чрез святого угодника Божия исцеления сподобльшаяся.

Радуйся, по егоже глаголу в ризу юродства облекшаяся.

Радуйся, подвиг сей яко крест свой на рамена взявшая.

Радуйся, во след за Христом его тако понесшая.

Радуйся, святая блаженная мати Любовь, угоднице Христова и молитвеннице о душах наших.

Кондак 2

Видящи мать твоя, блаженная Любовь, дивное твое исцеление, и чудящися таковому странному тебе явлению, обуреваема сомнениями, шедше во храм, в немже вразумися пресвитером, рекшим: се воля Господня, темже благослови тя на подвиг сей многотрудный, Богу воспев: Аллилуиа.

Икос 2

Разум юродством сокрывшая в суетной жизни града большего, смирением пламень страстей

погашала еси, богоблаженная мати, тайных молитв твоих слезы и воздыхания кто изочтет? Мы же сие воспоминающе, зовем тебе сице: Радуйся, образ терпения и незлобия явившая. Радуйся, мнимым безумием сияние благодати сокрывшая. Радуйся, чуждая миру, сущих же в нем не чуждавшаяся. Радуйся, о людях скорбящих Богу молившаяся. Радуйся, в доме своем добровольно себе затворившая. Радуйся, дивный сей подвиг от нас утаившая. Радуйся, пути указание от Бога приявшая. Радуйся, на путь сей с радостию вступившая. Радуйся, святая блаженная мати Любовь, угоднице Христова и молитвеннице о душах наших.

Кондак 3

Силою Вышняго укрепляемая и промышленности Его повиновавшаяся, блаженная мати Любовь, ближним своим послужити хотящи, домашний затвор свой оставила еси, и яко истинная угодница Божия, непрестанно взывала еси Богу: Аллилуия.

Икос 3

Имущи в себе, о блаженная мати, огонь любви
Божественная, возсияла еси яко светильник на
свещнице, тьму наших грехов просвещая, и
подобно безплотным ангелом всегда воспаряла
еси горе. Мы же во умилении глаголем тебе
сицевая:

Радуйся, странствию Христову поревновавшая.

Радуйся, стогны града Рязани проходявшая.

Радуйся, суеты земного мира отвергшаяся.

Радуйся, сладости райския вкусити
сподобившаяся.

Радуйся, жилище твое ради служения людям
презревшая.

Радуйся, Небесного крова взыскавшая и
получившая.

Радуйся, вся красная мира ни во что же
вменившая.

Радуйся, таковою жизнью любовь Божию людям
показавшая.

Радуйся, святая блаженная мати Любовь,
угоднице Христова и молитвеннице о душах
наших.

Кондак 4

Буря мирской суеты не возмогла есть поглотити
тя, богомудрая Любовь, ты бо яко по суху
пешешествовала еси по бездне житейского

моря, уподобившись Спасителю нашему, благодарственно поя Тому: Аллилуия.

Икос 4

Слышаще и видяще жители града Рязани таковое житие твое богоугодное, с любовью ты приимаху под кровы своя. Ты же чудесно их вразумляла еси, странным образом показующи уготованное им от Господа. Помози и нам, блаженная мати, творити волю Его всеблагую, да тако ты величаем:

Радуйся, граду Рязани дивное украшение.

Радуйся, яко от беззаконий наших приводиши ны в сокрушение.

Радуйся, грядущая, яко близ сущая созерцавшая.

Радуйся, славы людския, яко змия лукаваго избегавшая.

Радуйся, мудростию на благое нас наставляющая.

Радуйся, потемненныя очи душ наших просвещающая.

Радуйся, страсти яко гонителя фараона потопившая.

Радуйся, благодать Святаго Духа яко манну Небесную вкусившая.

Радуйся, святая блаженная мати Любовь, угоднице Христова и молитвеннице о душах

наших.

Кондак 5

Боготканною одеждою благодати облаченная, не взирала еси на лица и звания, ни на почести временныя, мати наша, избегающи похвал и тщеславия, научи же и нас о единой славе Небеснаго Царствия пещися, и Единому в Троице Богу славу возносить, вопия Тому: Аллилуия.

Икос 5

Видевше людие благочестивыя многотрудное твое странствие, егда во утруждении на степенях домов отдохнути тебе приключалось еси, хотяще умалити страдания твоя, брашно и питие приношаху. Ты же, подвиг свой сохранить желаючи, блаженная мати, убогим сие раздавала еси. Мы же, дивящися нищете твоей вольней, с любовью поем ти таковая: Радуйся, юрода словуци, мудрости нас наставляеши.

Радуйся, яко безумие мира юродством обличаеши.

Радуйся, сладость райскую в нищете духовной вкусившая.

Радуйся, ради тоя сладости вся земная нивочтоже вменившая.

Радуйся, поношения и насмеяния к сердцу
своему не допускавшая.

Радуйся, вся приносимая тебе нищим
раздававшая.

Радуйся, нестяжанию нас научающая.

Радуйся, богатство свое во Царстве Небесном
сбравшая.

Радуйся, святая блаженная мати Любовь,
угоднице Христова и молитвеннице о душах
наших.

Кондак 6

Проповедница велегласная явилася еси,
богоблаженная мати, егда в годину смутную
грядущия на нас напасти заведомо прорекла
еси. Но и в тяжкия дни испытаний, егда мнози,
страхом объаты бывше, бежаша, образом своим
научала еси вопияти с надеждою Богу:
Аллилуиа.

Икос 6

Возсиявше яве истинность словес твоих, в
притче глаголаных, егда падоша стены
иерихонския и держава Российская предана
бысть поруганию. Умоли же Христа Владыку, о
блаженная мати, да поможет нам иго сие
понести и страдания наша умалит. Мы же тако
тя ублажаем:

Радуйся, посреде напастей нас не оставляющая.
Радуйся, страсти наша Небесною прохладою орошающая.
Радуйся, из пучины отчаяния нас изводящая.
Радуйся, к тихому пристанищу нас приводящая.
Радуйся, уныние сердец наших возвеселяющая.
Радуйся, изнемогающия силы наша ободряющая.
Радуйся, во времена гонений твердо в вере стоявшая.
Радуйся, на милость Божию уповати нас научающая.
Радуйся, святая блаженная мати Любовь, угоднице Христова и молитвеннице о душах наших.

Кондак 7

Хотя проявити величие любве и милосердия Своего к падшему роду человеческому, егда приблизися время разорения обители Казанския от безбожник, не остави Господь в печали раб своих и посла тя, блаженная мати наша Любовь, во утешение сестрам скорбящим, да тыя во дни искушений не отчаянием повергаются, но напасти сносяще безропотно, Богу хвалебную песнь воспоют: Аллилуия.

Икос 7

Новое чудо явивше, достоблаженная мати, егда сестрам во смятении сущим, грядущее прорекла еси, и слезныя рыдания их умалила еси надеждою несумненною на Заступницу Матерь Божию. Сие убо изволение похваляюще, зовем ти тако:

Радуйся, во ограду Казанския обители входившая.

Радуйся, тамо в келиях долгия дни пребывавшая.

Радуйся, во страдании сущих утешавшая.

Радуйся, в бедах и напастех отраду подававшая.

Радуйся, Христовых избранниц на путь к Небесному Жениху наставлявшая.

Радуйся, тяготы узкаго пути с ними разделявшая.

Радуйся, яко путь грядущий им прорекла еси.

Радуйся, наказавшая путь сей благодаряци Бога пройти.

Радуйся, святая блаженная мати Любовь, угоднице Христова и молитвеннице о душах наших.

Кондак 8

Странно и дивно бе житие твое непорочное, великими знаменьями бо многих от сна греховнаго возставляла еси к покаянию: овым

исцеления подаваше, овым же скорую кончину возвещаше, иных же тайныя помыслы обличаше. Темже молим тя, Любовь блаженная, просвети нашу тьму безверия, ко исправлению нас наставляющи, да на Страшнем Судище Христове не постигнет нас участь шуия, но да сподобимся со избранными Всемогущему Богу взывати: Аллилуиа.

Икос 8

Вся исполнишися любви Божественныя, даров Святаго Духа вместилище явилася еси:
скорбящих утешающая, немощных
защищающая, нищих одевающая, недужных же
исцеляющая, сего ради вопием ти:
Радуйся, сирым и убогим помогавшая.
Радуйся, бедных и вдовиц окормлявшая.
Радуйся, немощных верное защищение.
Радуйся, недужных скорое исцеление.
Радуйся, теплыя молитвы за ны возносящая.
Радуйся, тем и всех нас к Богу прибегати
научающая.
Радуйся, дара прозорливости крайним
смирением стяжавшая.
Радуйся, туне от сего дара требующим
раздававшая.
Радуйся, святая блаженная мати Любовь,
угоднице Христова и молитвеннице о душах

наших.

Кондак 9

Вся добродетелей исполнена бывши, Любовь блаженная, с молитвою на устех предала еси дух твой в руце Божии, Иже всели тя в Небесныя обители, идеже ангельстии чини и святых собори радостно прияша тя. Ты же испроси и нам у Господа мирную кончину христианскую, да воспоем Ему хвалебную песнь: Аллилуиа.

Икос 9

Ветии многовещанныя недоумеют, како восхвалити тя, достоблаженная мати, ибо пачеестественная многая преславная чудодействия еще в житии своем показала еси, но и по преставлении тая благодатию Божию творити не престаеши. Мы же, любовию понуждаеми, дерзаем пети тебе сиче:
Радуйся, многими добродетельми украшенная.
Радуйся, молитвеннице наша пред Богом дерзновенная.
Радуйся, тесным путем юродства до врат Небесных шедшая.
Радуйся, в чертог Небеснаго Жениха во гласе радования возшедшая.
Радуйся, дивная мати, благия памяти достойная.

Радуйся, по блаженней кончине твоей Богом
возвеличенная.

Радуйся, века сего суемудрия отвергаться ны
научающая.

Радуйся, чтущим любовь память твою в бедах
и скорбех помогающая.

Радуйся, святая блаженная мати Любовь,
угоднице Христова и молитвеннице о душах
наших.

Кондак 10

Спаستися хотяй всем Господь откры чрез
кончину твою благодатную, како достоин
готовыми быти ко преставлению, егда девице
некоей наказала еси, блаженная мати наша
Любовь, гроб твой розовым тканьем облещи, ибо
не печаль, но радость в смертном часе прияти
сподобилася еси. Тако и ныне в Горнем
Иерусалиме пребывающа, радостно поеси Богу:
Аллилуиа.

Икос 10

Стеною непроходимую жители рязанския, в
рыдании и горести о сиротстве своем,
заполниша стогны града нашего, блаженная
Любовь, уразумеюще тела твоего погребальное
шествие, мняху бо ся оставленных быти твоим
заступлением. Мы же, ныне празднующе память

твою, прибегаем к молитвенному покрову
твоему и в надежде восхваляем твоя звание сими:
Радуйся, Царство Небесное унаследившая.
Радуйся, любовь Божественную блаженство
бессмертия жизни нам открывающая.
Радуйся, яко золото в горниле искусившаяся.
Радуйся, яко всеплодие жертвенное прият твоя
Господь.
Радуйся, венце из мира, радования и благодати
сплетенный.
Радуйся, многоценная кадильнице, фимиам
хвалы к Богу возносящая.
Радуйся, лампадо, к Богу сердцем своим
горящая.
Радуйся, сосуде благодати неизсякаемый.
Радуйся, святая блаженная мати Любовь,
угоднице Христова и молитвеннице о душах
наших.

Кондак 11

Пение сие похвальное, аще бы и тьмочисленное
приношением твоя, мати наша Любовь, не довлекло
бы к прославлению добродетелей и чудес твоих,
обаче хвалу Богу возсылающе за вся, яже во
святых Своих нам являет, Тому поем: Аллилуиа.

Икос 11

Трисиянным светом осияваема, со всеми святыми предстоиши ныне на Небеси престолу Царя царствующих, Любовь многоблаженная, и отгуду, яко светозарное светило просвещаеши землю Рязанскую, разгоняющи мрак заблуждения и показующи путь к Небесному блаженству. Сего ради прославляющи тя, глаголем:

Радуйся, пророком еси сопричастница.

Радуйся, яко с преподобными пребываеши.

Радуйся, праваго пути верная наставнице.

Радуйся, чистоты и целомудрия предивная хранительнице.

Радуйся, Солнцем Правды озаренная.

Радуйся, простотою смиренномудрия благоукрашенная.

Радуйся, мглу сомнений наших разгоняющая.

Радуйся, свеще, горением к Богу сердца наша возжигающая.

Радуйся, святая блаженная мати Любовь, угоднице Христова и молитвеннице о душах наших.

Кондак 12

Благодати обилие прияла еси, многоблаженная, по обилию любве твоея ко Христу Богу, ныне же прилежно взываем к тебе, мати наша Любовь,

пролей теплую о нас ко Господу нашему молитву, да сохранит Церковь Свою Святую невреждену от ересей и расколов и вся православная да помилует и спасет, вопиющая Ему: Аллилуиа.

Икос 12

Поюще пресветлую память твою, восхваляем тя, блаженная мати Любовь, обаче не могуще достойне изобразити высоту смирения и любви твоея к нам, с благоговением и радостию зовем ти:

Радуйся, свободу от всякия тщеты улучившая.

Радуйся, многим очи духовныя и сердца к покаянию открывшая.

Радуйся, в скитаниих жизнь проведши, к желанному раю пришедшая.

Радуйся, любимаго Господа узревшая.

Радуйся, яко никакая скорбь, ни теснота не возмогоша тя разлучити от любви Христовы.

Радуйся, явившая нам, како любовь

Божественная приводит к жизни вечной.

Радуйся, приявшая на ся безумие Христа ради.

Радуйся, обретшая мудрость во Христе.

Радуйся, святая блаженная мати Любовь, угоднице Христова и молитвеннице о душах наших.

Кондак 13

О блаженная мати наша Любовь, хранительнице и заступнице земли Рязанския. Приими ныне малое сие моление наше и призри на прилежно просящия тя, ты бо еси молитвенное к Богу предстательство наше. Испроси нам у Христа чистоту телесную и душевную, да в мире и покаянии прочее время живота скончавше, достигнем Небесных обителей, идеже с тобою и всеми святыми сподобимся воспевати в Троице славимому Богу: Аллилуиа. [Трижды.]

Молитва

О, достоблаженная мати Любовь, угодница Христова! Услыши нас, грешных, молящихся тебе. Приими молитву нашу и принеси ю к Милостивому и Человеколюбцу Богу, Ему же ты ныне в радости святых и с лики Ангел предстоиши. Умоли Его благосердие, да сохранит град сей Рязань, в нем же, добродетельно поживши, Богу угодила еси, от всех навет вражиих, да не осудит ны по беззакониям нашим, но да сотворит с нами по милости Своей. Испроси нам у Христа и Бога нашего мирное и безмятежное житие, здравие душевное и телесное, земли благоплодие и во всем всякое изобилие и благоденствие, и да не во зло обратим благое даруемое нам от

Всещедраго Бога, но во славу Его и в прославление твоего заступления. Паки молим тя, блаженная мати наша Любовь, посещай нас, тебе молящихся, в нуждах наших, да тобою заступаеми, сподобимся в день Судный одесную Сына Божия стати твоими святыми молитвами ко Спасу и Пресвятей Его Матери, Преподобной Владычице нашей Богородице, от всех родов ублажаемой, ныне и присно и во веки веков. Аминь.



**ПОЛНЬІЙ
АКАФИСТНИК
КАНОНИЧЕСКІЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НУЖЕ
НЕБО**